

**Broj: 13/06-3-11-30-865/26**  
**Sarajevo, 11.05.2026. godine**

Na osnovu člana 14a. Zakona o javnim nabavkama Bosne i Hercegovine („Službeni glasnik Bosne i Hercegovine“, br. 39/14, 59/22 i 50/24), a u vezi sa pripremom postupka javne nabavke za implementaciju Zakona o fiskalizaciji transakcija u Federaciji Bosne i Hercegovine, Porezna uprava Federacije Bosne i Hercegovine objavljuje

## **POZIV ZA PRETHODNU PROVJERU TRŽIŠTA I DOSTAVLJANJE INFORMATIVNIH PRIJEDLOGA RJEŠENJA**

U skladu sa članom 14a. Zakona o javnim nabavkama Bosne i Hercegovine, prije pokretanja postupka javne nabavke ugovorni organ sprovodi provjeru tržišta u svrhu pripreme nabavke i informisanja privrednih subjekata o svojim planovima i zahtjevima u vezi sa nabavkom. U tu svrhu ugovorni organ može tražiti ili prihvatiti savjet nezavisnih stručnjaka, nadležnih organa ili učesnika na tržištu.

Polazeći od navedenog zakonskog ovlaštenja, te poštujući osnovna načela javnih nabavki – načelo zabrane diskriminacije, jednakog tretmana, transparentnosti i osiguranja pravične i aktivne konkurencije – Porezna uprava Federacije Bosne i Hercegovine (u daljnjem tekstu: Ugovorni organ) ovim putem provodi prethodno istraživanje tržišta u svrhu pripreme postupka javne nabavke za implementaciju Zakona o fiskalizaciji transakcija u Federaciji Bosne i Hercegovine („Službene novine Federacije Bosne i Hercegovine“, broj: 9/2026).

### **1. Predmet prethodne provjere tržišta**

Predmet prethodne provjere i istraživanja tržišta je prikupljanje informativnih prijedloga rješenja u vezi sa implementacijom **Zakona o fiskalizaciji transakcija u Federaciji Bosne i Hercegovine**, koji je Dom naroda Parlamenta Federacije Bosne i Hercegovine usvojio dana 23. januara 2026. godine.

Navedenim zakonom uređuju se:

- obaveza izdavanja elektronskih faktura i fiskalnih računa,
- elektronski sistem za evidentiranje transakcija,
- sistem nadzora u oblasti fiskalizacije transakcija,
- kaznene odredbe,
- druga pitanja od značaja za fiskalizaciju na teritoriji Federacije Bosne i Hercegovine.

Zakon uvodi moderan, digitalni sistem za nadzor i prijenos informacija o transakcijama u realnom vremenu.

Planom nabavki Porezne uprave Federacije Bosne i Hercegovine za 2026. godinu, a koji je na Portalu javnih nabavki u skladu s članom 17. stav (5) Zakona o javnim nabavkama objavljen dana

30.01.2026. godine u sastavu Plana javnih nabavki Federalnog ministarstva finansija - financija pod rednim brojem 55. (usluge), planirana je nabavka „Integralnog rješenja za podršku primjene Zakona o fiskalizaciji transakcija“ za potrebe Središnjeg ureda Sarajevo – Sektora za informacionu tehnologiju Porezne uprave u Federaciji Bosne i Hercegovine, s predviđenim okvirnim datumom pokretanja postupka javne nabavke u junu/lipnju 2026.godine.

U tom smislu, Ugovorni organ poziva sve zainteresirane pravne subjekte iz Bosne i Hercegovine i inostranstva da dostave informativne prijedloge rješenja, posebno u pogledu:

- tehničkih i funkcionalnih rješenja za implementaciju elektronskog sistema fiskalizacije,
- arhitekture sistema za prijenos podataka u realnom vremenu,
- sigurnosnih standarda i zaštite podataka,
- interoperabilnosti i integracije sa postojećim informacionim sistemima Ugovornog organa,
- modela implementacije (centralizirani, distribuirani, hibridni),
- faza implementacije i procjenom vremenskih okvira realizacije,
- informativnom procjenom okvirnih troškova,
- iskustvima iz drugih država (EU i šire) u implementaciji sličnih sistema,
- prijedlozima modela održavanja i tehničke podrške.

Ovaj poziv se provodi isključivo u svrhu pripreme dokumentacije za budući postupak javne nabavke i ne predstavlja pokretanje postupka javne nabavke niti stvara bilo kakvu obavezu prema učesnicima.

## **2. Način dostavljanja prijedloga**

Zainteresirani pravni subjekti mogu dostaviti:

- informativni opis predloženog rješenja,
- informativnu tehničku dokumentaciju ili konceptualni model,
- informativnu procjenu troškova,
- reference o ranijim implementacijama sličnih sistema,
- druge informacije koje smatraju relevantnim.

Informativne ponude se dostavljaju u priloženom formatu RFI = Request for Information (Zahtjev za informacijama) koji predstavlja strukturirani obrazac kojim ugovorni organ ispituje tržište prije objave tendera, prikuplja tehničke i tržišne informacije, procjenjuje realnu vrijednost nabavke, provjerava dostupnost relevantnih tehnologija i testira izvedivost projekta.

Navedena praksa predstavlja način na koji se u državama članicama Evropske unije provodi prethodno istraživanje tržišta prije pokretanja formalnog postupka javne nabavke. Ista proizilazi iz Direktive 2014/24/EU o javnim nabavkama, a koja je transponirana u Zakon o javnim nabavkama Bosne i Hercegovine (član 56. Zakona o izmjenama i dopunama Zakona o javnim nabavkama, "Službeni glasnik Bosne i Hercegovine", broj 59/22).

Članom 40. Direktive 2014/24/EU Evropskog Parlamenta i Vijeća od 26.02.2014. godine o javnim nabavkama i o stavljanju izvan snage Direktive 2004/18/EZ, propisano je kako slijedi:

### **Prethodna provjera tržišta**

Prije pokretanja postupka nabavke javni naručioc i mogu provesti provjeru tržišta u svrhu pripreme nabavke i informisanja privrednih subjekata o svojim planovima i zahtjevima u vezi s nabavkom.

U tu svrhu naručioci mogu na primjer tražiti ili prihvatiti savjet nezavisnih stručnjaka, nadležnih tijela ili učesnika na tržištu. Taj savjet može se koristiti u planiranju i provedbi postupka nabavke, pod uslovom da ti savjeti ne dovode do narušavanja tržišne konkurencije, te da ne rezultiraju narušavanjem načela zabrane diskriminacije i transparentnosti.

Cijeneći činjenicu da je kod projekata kao što je fiskalizacija u realnom vremenu tržište izuzetno kompleksno, da postoje različiti modeli (Srbija – centralni model, Hrvatska – online fiskalizacija, itd.), da cijene implementacije variraju, detaljno istraživanje tržišta smanjuje rizik od nerealne procjene vrijednosti, tehnički diskriminatornih uvjeta, tehnički neizvodivih zahtjeva, kao i žalbi ponuđača.

Svi zainteresirani pravni subjekti mogu dostaviti svoje informativne prijedloge u elektronskoj formi (PDF format) isključivo u priloženom EU RFI formatu na službeni e-mail adresu Porezne uprave Federacije Bosne i Hercegovine: [javnenabavke@fpu.gov.ba](mailto:javnenabavke@fpu.gov.ba) sa naznakom:

### **„Prethodno istraživanje tržišta – Implementacija Zakona o fiskalizaciji 2026“**

#### **3. Rok za dostavu informativnih prijedloga**

Rok za dostavu informativnih prijedloga je **30 (trideset) dana od dana objave ovog poziva na web stranici Porezne uprave Federacije Bosne i Hercegovine.**

Nepotpune i neblagovremene prijave neće se uzimati u razmatranje.

#### **4. Napomene**

- Ovaj poziv provodi se isključivo u svrhu prethodnog istraživanja tržišta, u skladu sa članom 14a. Zakona o javnim nabavkama Bosne i Hercegovine,
- Učešće u ovom prethodnom istraživanju tržišta je dobrovoljno,
- Dostavljeni informativni prijedlozi ne obavezuju Ugovorni organ na pokretanje postupka javne nabavke niti na prihvatanje bilo kojeg predloženog informativnog rješenja,
- Ne stvara bilo kakvu obavezu prema učesnicima ovog prethodnog istraživanja tržišta,
- Ne daje pravo na naknadu troškova u vezi sa učešćem u ovom prethodnom istraživanju tržišta,
- Svi podaci dostavljeni u okviru istraživanja koristit će se isključivo u svrhu analize tržišta i pripreme tenderske dokumentacije,
- Ugovorni organ zadržava pravo da sa zainteresiranim subjektima/potencijalnim ponuđačima koji iskažu interesovanje za prezentiranjem svojih prijedloga ili rješenja organizira sastanak u prostorijama Središnjeg ureda Ugovornog organa, pri čemu će omogućiti prisustvo na licu mjesta ili online (putem Zoom-a ili sl.) takvoj prezentaciji, transparentno svim potencijalnim ponuđačima koji su učestvovali u dostavi informativnih ponuda po ovom pozivu
- O tačnom datumu i vremenu održavanja prezentacije svi potencijalni ponuđači koji su učestvovali u dostavi informativnih ponuda po ovom pozivu će biti pravovremeno obaviješteni putem web-stranice Ugovornog organa, kao i o načinu na koji mogu prijaviti svoje učešće.

Ovaj poziv za prethodnu provjeru tržišta objavljuje se na službenoj web stranici Porezne uprave Federacije Bosne i Hercegovine.

**POREZNA UPRAVA  
FEDERACIJE BOSNE I HERCEGOVINE**